



普庵至善弘仁圓通智慧寂感妙應慈濟真覺昭貺惠慶
護國宣教大德菩薩語錄

述普光明殿

觀夫普光明殿非假莊嚴淨土道場即心無別心淨則佛
土皆淨身光則法界全光迷逐相而悟返真聖思修而凡
不覺背覺合塵者輪迴六趣背塵合覺者體用真如一性
湛然自分迷悟心本無間空色相爭空本不空色元無色
若了色空之不異受想行識亦如然所以釋迦如來出世
蓋為一大事因緣唯以佛之知見示悟衆生故衆生知見
皆是業識茫茫墮愛見網不得自在佛以無念而知名正
遍知得大總持法身圓滿演說三身四智八解六通而知
名異體同皆是化衆生事若會一合相應物如水月空

花未解三界唯心觸目則前塵萬境若非古佛傳燈住法
如人入闇三僧祇劫世變而佛法不移凡聖混融本靜而
妄自生滅直了諸行之無常便笑世間生滅法生滅滅已
更無私寂滅光中常快樂嘆實為萬古鎮騰輝堪化衆生
作佛事且如南泉慈化不知幾代住持木朽像摧破瓦上
年鑿景祐古佛腹裏爛帛遺彭氏之名皆此地上古之僧
檀祝聖道場而建立是知佛假衆緣道不孤起某如雲橫
谷似鶴翹松應無所住而生其心應無所得而得其法初
居而不厭荒寂末後而一看無忻一心幻出於有無念劫
圓融於無際以無量之三昧道化無方了凡聖之一源達
有為功如夢雖然如是念窮子之迷歸止宿草庵方付本
家之寶藏風幡動處直指人心栢子庭前全彰妙意又

何疑靈山會上佛舉一枝迦葉笑時靈光續燄法身非相
安可以泥像丹青法界彌綸何必造銀樓金屋達磨九年
面壁果熟時處處道場靈祐踢倒淨錡至今顯為山天下
佛祖究心而不在事天龍恭敬不為忻凡夫求事不觀心
暗被鬼神妖魅惑但得本而末自至道德全而事自成近
世道僧罕依正法未得先覺之心却作古人之用古德以
智為體通於一而萬事畢以慧為用無心得而鬼神伏智
本不空無住妙慧天網恢恢所以應物無心萬物而皆備
於我觀根逗教反身而樂莫大焉是以華嚴論主云以法
身用則萬象俱寂隨智用則萬象俱生見性成佛則一身
多身解空實相則一相無相是謂三界之依師可作群生
之導引苟或未然出家無益自己尚業識茫茫無本可據

更教他失錢遭罪著甚來由休道佛法不靈自是非心因措金剛經云種種非心皆為非心過現未來覓不可得江西馬祖云即心即佛非心非佛永嘉大師云是則龍女頓成佛非則善星生陷墜作是觀者名為正觀若他觀者名為邪觀天生萬物唯人最靈邪正是非何不體悉且不知四大假合身若浮雲外染六塵妄執顛倒十不善業百劫連綿愛禽獸血肉而互相殺啗樂浮利虛名而結業纏身忽然身壞浮雲銷業滿報流何處躡某不因夙習般若安能智悟無師如今到裏許方知千萬中實難淘一二古佛今佛歲教顯然有大慈悲碎身難報東西二土得法祖師撮畧玄機直明心印不立文字豎拂拈提只欲蠢動見聞齊登正覺問聰明多智久參方而猶尚難聞豈可蠢動含

靈一聞見而便能覺悟華嚴經云一切諸佛於一微塵衆生心中成等正覺而其衆生不覺不知又云一切衆生是諸佛之果源善男子莫作是說經云蠢動含靈皆一佛性耳所以佛說華嚴經云我初成道之時於自身中見一切衆生悉皆成道我入涅槃時見一切衆生盡入涅槃如一衆生未成佛終不於此取泥洹無非真得道人在處含靈獲益金剛經云在在處處若有此經一切世間天人阿脩羅所應供養當知此處則為是塔皆應恭敬作禮圍繞以諸香花而散其處佛果有如是之言真實不虛業報有如是之苦如影隨形了道化百千萬人且不見有衆生境界無心受種種布施且不見外有一文施者受者光影一如有作無為皆歸實相以此功德贊歎何窮祝萬壽以無疆

願天長而地久公清正而民快樂私孝順而含識安飛空
著地而皆演梵音大地山河而齊標心印自此即當處淨土
一念而觸目西方無生殿裏悟無生本覺位中瞻正覺瓊
重

化藏經語

釋迦如來為一大事因緣故出現於世棄金輪王寶位雪
嶺修行說法四十九年成五千四十八卷字字無空言言
諦實只欲開化衆生元本是佛若無衆生顛倒何勞廣布
文言蓋為衆生背本性而不覺不知念念循六道四生頭
頭趣三輪惡報如來若不出世世界受苦何休種種方便
利益迷情若有衆生念念依經持戒永斷無明修一切善
法即得無上正徧知與佛無二方覺衆生本心即佛心外

無法可得善男子有念有知衆生境界無念無知二乘境
界無念靈知諸佛境界聞佛知見永不受生心則不滅以
法為身常住世間猶如虛空包含萬有不即不離非色非
空非有非無絕對待非形名先天地越古今一相無相真
實相一身多身真法身身含萬有盡虛空塵刹而毫端普
現是故經云佛說刹說衆生說三世一切說若能如是說
能如是聞是真聞法是真說經經云如是我聞一時成佛
更無二時經云無法可說是為說法有相有說不名說法
若以色見佛則不能見如來若以聲聞經是人行邪道得
意忘言了色通聲便知道摩竭掩室妙解正宗示滅雙林
法身常住善男子佛是西天之梵語此土將覺義以同名
心迷不覺屬衆生心轉覺時一切佛佛開口處為言教化

導迷心轉覺心衆生開口成寐語沙魘群迷叫不醒迷悟
不同希達者諸佛方便救迷情情忘想盡明心者海藏琅
函不可輕在在處處堪聞演共祝吾皇亘古今臣忠子孝
邦邊靜風雨調和物物成是非一體元無二佛與衆生不
出心我今圓滿如來藏唯願衆生發信心等與如來同受
用一聞千悟永瞻欽這回針芥若不遇刹那失足墜幽冥
閻公問汝將何答未免刀山火燄林地獄皆因心不悟一
十八界杳難尋八萬四千城可畏鍊圍無間苦呻吟箇中
不遇佛光照萬劫無由得出輪叨利諸天因業墜後聞天
鼓復超升人生有限空花相光陰迅速豈堪停古人究道
如救頭後士無依豈不驚一失人身難再復榮華富貴苦
來臨如今自有非他事性水澄清理甚深海印森羅融萬

象湛然無古亦無今化無所化知無二自肯随心了此經

化藏經語

結般若因 度有緣衆 一卷一千 共亦不共

纔出頭來 便得受用 此經無價 擬議不中

除非自肯 破塵了夢 見佛不空 塔成無縫

半偈捨身 古今尊重 劫火不燒 魔不能動

佛祖皆宗 天龍普供 萬莫放過 千億珍重

切以般若彌綸法界唐言智慧以無邊寶積曼陀任是千
賢難揜足涅槃自性不滅不生廣佛華嚴妙行無住一百
十城而不動遍周十二頓漸而該收毫末塵塵刹刹佛意
全包迷悟不同故勞演說大解脫不立文字二乘學則執
滯空言如如方契色非空若也解空空非色十二部詮如

說夢百千萬佛若空花涅槃生死杳無蹤本來面目非非相大開喜捨破微塵了取功勳無盡藏甚幸

與易仲能化經

○咦佛則自心光明遍照外無毫髮許堪作能為假使聚大地山林為筆四大海水為墨不能寫普眼經半偈經云如來為一大事因緣出世唯以佛知見開發一切衆生心中同佛知見不同凡解若無衆生妄想裏許安用教詮是以藥山不看經達磨不立字儒教詩三百一言以蔽之三門則似網求魚達了者忘言得意普庵老人畢竟這邊了方向那頭來梵刹則樓閣新嚴徒集而無可塞目古德云令人看古教未免心中鬧要免心中鬧應須看古教驀地裏撞着磕着千萬莫辜負老僧假使轉念精勤明朝也有

飯喫瓊重

示小師圓契修袁州浮橋語

寂性普雲遙書寄頌只會得箇昭昭靈靈向野狐口邊邏
豈骨頭喫了又東覷西覷你且不知化城共南塔鬪額集
雲與鳳嶺交參若不是南泉種種方便也不免墮坑落塹
龐老子前日又到院中重舉公案又道空手不把鋤頭步
行不騎水牛橋上無人過水流橋不流這老漢當下被我
拽定老大鼻頭拖出了也汝諸人十二時中且不知有恁
麼奇特以平報不平事又聞道百鳥啣花人天設供當下
著語云蒼天蒼天誰敢擔當然雖如是且好生造橋大要
平穩堅牢更加疾速水漂不動風吹不移度人無碍諸佛
歡喜天龍守護到處無碍全不漏泄通途無阻郭匠圓契

快著力歸來與你三十棒教你一生起不得作箇無事人
好歌曰閑步遊南陌惟便野興多傍花看蝶舞近柳聽鶯
歌且照顧莫失了彌髓精

示李老人

道絕浮言法無可說只為衆生喪本受輪溺於邪見所以
諸佛慈悲方便於諸衆生自心中密說而顯演流通一大
藏教隨利鈍根機廣垂接引遂致祖師機緣諸佛法教盈
布於天下只欲標心所以經云諸經皆以心為宗無門為
法門若了於心無法不備奈何如今去聖時遙魔強法弱
正信希有棄有著空南北分宗頓漸說教棄本逐末竟是
爭非說正說邪顛倒四起所以普庵老人忍禁不得不免出頭
露一心光舍融萬有非心非佛即心即佛妙用縱橫隨機自

在言語詮之不及情量莫測其端不立是非坐斷聖凡便
是釋迦佛親現丈六金身也與三十棒趁出為什麼如此祖
禰不了殃及兒孫善男子若宿因無分沒溺邪宗實難提
拔賴得曾親正念遭遇普庵依正念而心無亂惑汝今投
誠求語咨決大意實言告汝諸佛法道絕象忘言無證無
修非迷非悟汝但十二時中莫存情想莫生住著即境即心
即事即理閑緣不繫心識俱停常於行住坐卧中妙聲妙
色浩浩現前根塵意識了無所得若是如是信解受持不
虛平生親近智識所以甄州禪師云群靈一源假名為佛
體竭形銷而不滅金流朴散以長存性海無風金波自涌
心靈絕兆萬象齊照體斯理者不動步遍歷沙界不用力
而功益玄化如何背覺反合塵勞於陰界中妄自囚繫依

此勤參必不相賺因求決意謾筆如此善自護持珍重

與顯首座

顯老明禪入理深淵文殊為體妙用普賢鳳山得旨妙契
南源三株樹下坐斷雲烟金剛作眼鼻孔遼天言談諷詠
草木皆鮮欽風久矣偶覩惠然如天甘露沃我心田希有
希有世外金仙老婆心切示我窺鞭自知本有久被塵纏
普光明殿海印俱全彌勒閣中了了何言常在不欠觸目
無邊一毫頭上妙絕偏圓含融法界本體現前

示圓應行者看牛

圓應牛經劫没人收若不遇人虛度春秋如今橫穿鼻孔
水草皆休有時放有時收隨分納豈豈自性優游獨奈何
勞別討混跡應不迷流不許犯它苗稼也不犁它田丘飽

飲雪山肥膩一頓更不它求眉毛眼睫動轉綢繆試問為
山水牯牛有甚風流向左膊上書字著甚來由任你千般
引化不肯回頭不如卧雲枕月運氣常周假使銀蹄金角
氣射斗牛居吾腹內不得出頭吞底乃刀山劍樹業到解
散枯骸誰知體如巨海妄起浮漚風擊漚生漚滅何愁湛
然智海喻真牛圓應頭頭豈用修咄

示何邦美

○佛與衆生是三無差別邦美與普庵豈有假虛說三阿
僧祇劫因如來出現而幻假名七佛然燈蓋接群迷而演
唱故知諸佛不出世亦無有涅槃佛真法身十方常住一
切萬物皆屬無常不變不壞者為正徧知心故權名佛出
生入死是生滅安心喚作衆生所以如來為一大事出現

於世說法四十九年成五千四十八卷顯無量神通蓋為
此也此經是一切含靈之本萬法根源凡夫久習我人樂
著聲色逐境背元使之流浪四生輪迴六趣猶如夢影又
若空花設有求靜樂善探宗不遇本分真正見解之人反
成大咎過在邪師便是千劫萬劫不了公按若是宿種曾
會實相之士一聞便肯其人永不變壞縱然體用未全正
因不變事理意通豈似依邪道魔王執空頑正親近正法
之人捨不信邪師謬解那更三界之中受一法之所瞞一
心無相不隨妄念有緣生只這光中空不空亘古迄今無
生滅○噫千億珍重

示弟子易元逸

優曇鉢花三千年一度現大善知識五百生許相逢且道

曇花作麼現知識作麼逢滿眼烟波無極岸釣竿未舉好
先知莫道凡夫名利欲於中也有謝三兒留田易元逸宿
習般若一聞斯道而便自肯心直入南岩發願持齋而深
究本事普庵點首知是再來許你從戒定熏修久久當明
理性果從因有事豈偶然如今五百半千依實印當堂非
自誑既知如是豈可緘默哉時乾道戊子仲秋願求少語
以記宗風而老僧信筆書付

劉待詔呈頌求語

覺中體幻如月印千峰幻中思覺似雲點長空若得月輪
遍照而非碍可謂心月孤圓含虛寂用未見本來面目不
知弄影漢行履之處安可自恣迷妄不實之心向外卜度
久久澄想發揮不逢真正見解底人邪魔入心墮在魔境

失萬劫之正心作三界之魔族若得一念不生萬法無咎
道若太虛而無跡心如湛水以澄清須還絕待忘軀默契
普光明妙了知生死涅槃猶如昨夢豈用探文字說知解
而得者乎既蒙彭城老丈以三頌誥予筆苦不能到而加
寐語以警動寤常真不勞外覓應用自然莫執文字若要
得快疾麼○只這是千億珍重

示衆法語

示衆顛倒夢想忽然破直入孤峯常獨坐不曾相見與相
親祇麼巍巍迎達磨東西露柱滿添湯南北石頭快推磨
到與不到俱喫茶萬里清風同唱和快活快活也大哥達
磨達磨真老婆多時尋覓覓不見却來草裏念摩訶幾年
相伴走急走過新羅低頭覓不見舉首又蹉過今日無知

知不是強揚播若有知知者未免番成禍○咦四七二三
不立形塵劫三祇祇這箇從古迄今食不飡肚脹氣均常
不餓傷嗟捉月夜猿癡往復疲勞多退墮不知古佛只傳
心除了此心無別可師子子不消多直下無心唱哩囉拈
却眼來作鼻孔呵呵大笑探禪河無量劫來風泡子至今
汨沒和巴歌稽首寶積佛敬禮阿彌陀普庵此來無箇事
大家相勸演若多元來不識頭依舊何須苦苦更波波
示衆善者多魔自古今佛魔一體只空心心迷不覺慳成
賊心悟回頭便捨金莫恠迷心心怕賊賊心對面也難尋
三途地獄因斯得奉報須防仁不仁不是道人先注脚免
他來喜去沉吟一年三百六十日夢想顛倒不曾息耳聞
眼見普庵名更莫邪言喧戲劇思量生死大驚神唯了本

心稱第一暫時忽聽本無心解脫沉淪千萬億寄語諸人
莫踏虛勾闌不穩莫相依莫令墮入深坑下未免先當說
與伊來往任觀心不住聲香味觸且隨時孤峯獨特誰為
伴塵世忙然我道奇不是打齋趁會只欲真心不肯也不
燒紙供神依佛無相三昧悟談字字明心迷說如盲踏碓
粗粥淡飯羹湯但願精專不退不知再會何時達道心空
無對

寶藏論

離諸名色相實見如來藏能轉語成經本心非榜樣說有
即是無說無無伎倆不會自轉經依語成妄想夢裏推木
輪信施誰酬償不出牛馬羊入它闌圈養一文四箇字還
足連它喪悟者發真機迷者墮鍊網佛教空無相妙契合

無上天鼓解說經懺悔罪無量有無空不空真實不虛誑
圓信六神通不刻天龍像只麼轉心經箇中誰擬向

為小師圓通入涅槃小參

上堂云生死涅槃猶如昨夢衆生諸佛恰似空花了本解
空方能如是未明體用聞見差殊藏教顯然疑情難透蓋
緣生死不破如來所以現世為一大事因緣廣彰教網譬
喻凡情若解佛說譬喻便知本自無生既達本以無生如
是我且何滅先宗後覺意總如斯只是後學不遇真正導
師少成多敗某宿習般若親受正因所以今時無師自契
若無宿慧那信其經自有生來常知此事雖在塵而無染
時節到以自通及住此山十有六載終日不離華嚴境界
法喜禪悅之樂如度一時近於五六春秋隨機引接雖然

檀信百亂修造千忙於我本性湛然如空含境如鏡中像所以妙應縱橫全無漏缺此處化緣修造彼方教設建橋不斷宗體而普應十方不著名相而頭頭指印只患末法邪盛真信者稀而有小師圓通俗舍不遠父母皆存初年十二依壽隆老和尚出家未果周年老師遷化父母送至回禮老僧便肯遵規學華嚴教然後混同良友日與進士互參朝夕不忘微通消息為僧六載年雖幼而智似古錐行住坐卧語默施為不破老僧之教一二年來不耐邪魔幾乎漏逗賴遇老僧心能轉物忽從正月入室焚香懇懃作禮而告師言圓通宿福不廣雖透未全積病時生身多困倦緣事雖多不能為一欲求度寂皆賴師慈老僧叱之遂不復語師良久乃以指畫空云這箇為汝為病什麼物

為汝為病乃禮拜無言而歸寮又於二月二十七夜以空幻雙舉再告師云初三日求浴可得否師不答果至初三日晚索水浴身換衣求竹椅儼然安坐良久復謂行者圓清云請師到房中我書偈而長入寂光可麼行者依之師既到師子無言衆徒皆默索紙書偈云夢幻空花相豈可認作真如今不被使逍遙無外塵乃合掌請師歸方丈然後付囑弟圓智莫令母親喧哭鬧混老師法會委弟圓融等告老師只求一桶火化為妙不消棺木諸般有費十方檀信施物只得了當便休一切事皆如夢幻畢竟悉皆如是即便閉目不復語寂然不動直至如斯爭奈何咻老僧一時不免依圓通所願更不勞煩近遠檀那涅槃道友助廢俗儀修齋設供資化亡僧一文以上並不敢收如有小

師行者私自留一文一香一花一菓三十拄杖即時出院
去老僧拂袖入南嶺石窟裏打坐永不出頭也若如老僧
所告千萬莫勞神只要信遠長存僧真不朽寧可別有施
奉還了自心老僧即不敢阻節一任如常伏望衆信委悉
千幸萬幸珍重

示李昭文

海性湛然獨鑑萬像以無心風擊波騰真體不動而不變
自古迄今萬化歸元者只宗自心心外有求背覺合塵故
循業道且如諸佛說法蓋為衆生天下祖師亦復如是若
無衆生無法可說得見自性清淨便覺一切衆生本自不
生不滅一體清淨如幻見彼塵流以貪嗔癡殺盜淫而造
後報苦業不停遂假名字妙有為無妙無作有廣設建化

之門門門皆善是故金剛經云修一切善法即得阿耨多
羅三藐三菩提心不從行惡而獲來生善果諸佛了悟實
見一切衆生心本如虛空湛然不動因妄發起從十二因
緣出生入死直至如今夢趣六道汨沒四生不知元本不
生逐愛貪生不知本源不滅妄想怕死得聞善知識直指
人心不立文字言下開通自性目擊道存不見有世間往
來之事何處立父母生緣是故華嚴經云若人欲了知三
世一切佛應觀法界性一切唯心造若歇妄心真心自現
真心普現則照了三世非生滅故自性與佛祖同源問色
身合法身乃父母所生未離五行四大假合病苦煎煩如
何得與法身無二答佛說經云佛真法身猶若虛空應物
現形如水中月法身者乃非相也色身者色即是空也色

既還空因何不合法身只為一切衆生貪著我人造惡不
息不信佛說自心自身真如太虛一向苟色為活着言語
道不見自己法身所以眼光落處盡同暗室纔有思念便
變地獄餓鬼相現纔出頭來又入披毛戴角而酬前殺戮
之債更有三生九世無數無量欠負不可說古人云了即
業障本來空未了應須還宿債是以佛念一切衆生念念
作種種苦因將來一失人身萬劫不復故廣建道場演經
設像多立教詮曲為含靈早見自性別無它事珍重

與彭應求為母病請藥語

太虛日輪連晴塞身到裏舉似便打折玄沙一足如今且
道目連救母還復母救目連若於這裏下得一轉尖新之
語便見萬物一母病從何來妖從何得可以轉世間幻化

渾真心指太虛日輪為母體正當恁麼時周氏百劫千生
之罪垢斯來應念以銷鎔安心悉滅以無魔入普圓而成
正果別無它囑唯但順心逆則便凶順之則吉假饒尋釋
老看經亦不離自心開豁任意迎扁鵲盧醫皆除妄想今
再發藥幸跪獻於尊堂直待正春恣情調理恐聖善別立
安心逐一為他對治開解珍重普庵老人特為應求拯救
尊堂普說十二月二十五日叅普庵老僧就書頌與周氏
脫塵警心安執迷流不肯休所以今生逐女流如今眼界
渾塵染幾時安隱見來秋莫悞前途成業網目連成佛已
綢繆開心放曠依兒得不著高峰見比丘

除夜示衆

臘月三十夜髑髏自相罵閻老索飯錢汝等怕不怕龜毛

敲兔角五彩虛空畫正當恁麼時摩尼誰著價大年初一
日道閑却成急自拜夢中人妄想從誰立唯我知不知今
古希相識張三李四哥草木空祇揖日月轉眼睛應劫不
曾停三賢與十聖枉費苦精神常思達磨老九年守少林
如今意不盡瓦礫即真金

望牆

衆信助力壘三身之寶塔結萬載之良因不妨運水搬柴
步步皆修十善近遠宗祖因你信發各超昇後代兒孫不
出自心今合佛佛是衆生之慈父應無背子之心法即衆
生之良藥一服心清信心清淨則早見世尊隨分助緣必
招樂果千年修道只恐不遇明師一念發心便了普庵即
我奇哉淨土彌勒樓開大家下手莫遲遲廣望戒牆堅本

智工工計曆所設不虛將來名榜示江湖無限人天不如
汝人財未卜來朝塔在心存不朽再來相會宿時因脫却
布衣披法服只因正法一光全普度河沙無逆順因以法
韻成臨江仙警世化迷不見本來真面目恰如窮子迷途
東西南北覓工夫被人穿却鼻生死不能甦唯有寶陀人
失笑拈來放去毘盧空花不實汝休摸慈悲來不住開口
應南無
信神示普圓二字道友
出家無易事了道六非難各自要努力如人擔上山累劫
負償命此生莫等閑遇時若不順展轉落離關佛與人方
便度人及登山布身而填險為衆代艱難荷檐如來者莫
道不當番汝逆和尚順明朝報愈艱汝見有福者擁從物

如山在處皆如是因修得世間若爭人我相不如快下山
若酬自己債豈用學燒丹相逢無別有動不是風幡前後
都還却獨坐大雄山如遇官客欲人送過不問多少便差
圓普二行將錢米重雇覓左右作如不奈雇覓須是多方
計較無有空過者觀急緩隨宜不可執一只要了利慈悲
結緣歡喜來意無錢雇覓一任將道具索質當之物仰僧
行自己身命施扛搬往彼岸亦不致勞也何恠乎何羞乎
皆我一心耳時人須警覺應道不癡顛苦牛并急馬也只
少它錢今生還不足來生又喫鞭道人雖無事不忍哭蒼
天今古論如是豈可向愚言無我無錢質此處靜悄然顯
臨靈光在夢然一炷烟普庵何處去分明在目前須當如
是體可學老婆禪莫住空花相謗佛結深冤以善能銷惡

以順和逆顛以道資頑根以心助普賢以師為心本以念
於無緣以身如父母以力報愚賢出家為佛子動靜自光
鮮超凡并越聖真實不堪言曾經千萬劫碎身報未圓我
今排次定更莫聽胡喧順我大家吉逆我衆無緣孤峰無
覓處三千遍大千此時思一偈虛空應不傳非是我做作
真如體自然

普庵風水禪

夫華嚴經云衆生未離幻了幻非衆生圓覺了義經云依
幻說覺亦未離幻直至諸幻盡滅覺心不動始解般若堪
為說法之師喚作獅子之哮吼群獸腦裂天龍寂聽皆生
歡悅若不大用現前鑑覺未破由是生死岸頭事且與菩
提有何交涉普庵老人偶因賢士設拜于前云賢士也不

識印問一切世人各有罪福吉凶皆出自先祖會擇陰地
能擇陽宅有所招感遂獲兒孫富貴榮華此理還是真實
可信否普庵唱言不也善來善男子善哉善哉汝能如是
善達塵勞故有此問敢不為說我聞諸佛說法深嗟一切
衆生於無生中妄見生滅妄認四大為自身相以六塵緣
影為自心相將虛為實認無作有不知四大本空六塵非
有迷背真源流轉於三界火宅之中雖遭大苦不以為患
念念生死無求出離所謂我生則煩惱俱生我滅則煩惱
俱滅以妄求妄二妄相依生妄業道總由不知乾坤日月
大地山河色空明暗種種物類剝剝塵塵皆是自已心地
妙明彌滿更無纖毫外物可得無名相非形質無大小無
長短無邊表無變異無有無離言說不生不滅真如不動

雖無形無為而靈通萬有雖不動步而周遍十方於微塵
中現寶王刹猶如一顆摩尼寶珠圓淨無瑕克塞法界無
針鋒許空缺處照古照今永絕塵垢色雖有異珠體無變
安可於中妄生卜擇葬骨埋屍貪圖後報蔭益兒孫顯官
耀族永固長存豈不見古德垂語云兒孫自有兒孫福莫
與兒孫作馬牛若達斯言乃真出世人也莊子云天地為
棺槨信知古賢救世誠不謬矣然而吾教學道之徒得正
法眼歲者蓋為古佛有此一大事公按未了無能報効若
不度衆生無因酬佛德是故阿難得法之後與諸菩薩說
偈云將此身心奉塵刹是則名為報佛恩所以各各不違
實相權施引接應物隨機略露箇消息皆是不得已而為
之喚作第二門示境明心西天二十八祖以至天下傳燈

古德各立建化門庭隨機接物不勝其數不可備言且如
司馬頭陀得無心之妙用合無心之陰陽權指為山之寺
基堪安海衆要以達本明心建大道場標宗設教即非妄
想顛倒誑惑王民如我世尊為一大事因緣故出現於世
示衆生見性成佛若得成佛德及萬邦道舍三界豈小補
哉今時世人不知所以被人誑惑不肯自修心行幸有安
樂法門只欲著相貪求謬理信邪倒見力用無涯廣殺含
靈虛費家賄祛役衆生造無量業望求一彙永益兒孫損
衆利私無有是處如今凡俗尚言有福之人不彙無福之
地若人不修福德安可逆造化而背陰陽夫陰陽者無心
得其造化自然無功之功也無功用道者乃得正心也正
心者無心也無心者道也道是本來自性天真之源若能

一念返本還源一多互用智體無方可謂通於一而萬事
畢無心得而鬼神伏無作而作無用而用無向背無年月
無日時是故華嚴經云一念普觀無量劫無去無來亦無
住如是了知三世事超諸方便成十力豈可逆於正順於
邪逐妄言而尋風水哉風水者空也楞嚴經云性風真覺
性覺真風風者四大之一也無形相而能動大千九萬里
之鵬程皆風在下也藏經云風輪其力無邊廣大能乘水
輪水輪能乘世界動靜自然與道合爾何可尋求捉搦水
者百川一性也能利萬物而根通法界豈獨江河也但隨
順濕性而已經云性空真水性水真空亦可喻道周法界
安有朝富而背賤乎風水二名皆得性空安可逐凡情而
尋究然地水火風權名四大順天順道和會萬機古德云

四大未嘗不周遍周遍何曾有混融以要言之只是自心一體心外無法可得今告衆等但自回心向善慎勿貪求濟老憐貧方便救物護善遮惡離過絕非念念回光行陰布德諸惡莫作衆善奉行設有施為不用求報惡果善因自然當報何必憂慮幻形不貴安勞繫念兒孫自作自當他為他報且以夢而說夢談人之生死者各各逐妄迷真觸境而心起愛憎念念遷謝不停常趣黑業淪墮中陰悟心之士常以白法現前故經權名如來藏取境著相凡夫經標為阿賴耶識藏常著於物物則終歸變壞物無自性物壞則成黑業趣入中陰受陰既盡隨業受報古德云其為也形其窳也冥轉變天地自在縱橫恒沙妙用法混而榮誰聞不喜誰聞不驚如何以無價之寶隱在於陰入之

坑若不識寶徒入荆山眼見似盲口說如啞此無依之類永劫貧窮不得受用豈不見古賢云吾有大患為吾有身又云朝聞道夕死可矣何況凡流乎古人求道如救頭然如今世人將為末事近日佛日果禪師嘗示衆云一切慢事人將作急事一切急事人將作慢事又云生處放教熟熟處放教生深思此語乃真老婆心切蓋為一失人身萬劫不復不是小事果報歷然佛語不虛誠當熟覽終不相賺若能諦信萬無失一不信者墮業招殃信者悟心即佛金剛經云信心清淨則生實相實相者乃清淨法身也圓滿報身也千百億化身也證道歌云三身四智體中圓八解六通心地印說什麼三千大千世界山河大地有情無情一印印定更無別法喚作一生補處充滿法界一相無

相一身多身華嚴六相總別同異成壞一門超出一成一
切成一壞一切壞如如向上沒可安排恰似酸爐不藏蚊
蚋不生不滅亘古亘今靈明烜赫永絕名言超過數量既
達此理無不是自心一體孟子云萬物皆備於我肇法師
又道至人空洞無象而物無非我會萬物為自己者其唯
聖人乎何可將自心求自心將自己埋自己立境迷真生
死不破妄談風水人故當辨拏擇其善者而從之其不善
者而改之有諸衆生念善持戒看經禮佛忻善厭惡不退
初心者喚作二乘聲聞獨覺緣覺此是修功次第階級雖
未至佛地亦得出三界火宅離粗重業免墮三途且約人
天福報隨業輕重而生雖未離生死輪迴於天上人間受
大福不行善因復入地獄餓鬼畜生諸惡等報不可具陳

修禪定菩薩聞生天果報猶如冤家所謂諸佛猶是冤家
自己那堪覩著金屑雖貴眼中著一塵也不得如斯見解
豈由風水哉次有一類衆生口說善心行惡豁達空撥因
果不識理義毀謗正因瞞聖欺賢作不善業墮無間獄百
千萬劫無有出期實可哀哉延壽禪師云諸佛出頭來也
無救你處豈由風水也以道眼正觀茫茫宇宙汨汨紅塵
無非六道四生皆二十五有六塵十八界十二緣生無不
被輪迴經塵劫不息佛詮教網撈摠群生闡大慈悲設多
方便所以西天二十八祖達磨大師為此一大事遠來唐
土傳法救迷九年面壁誰敢承當直至二祖大師為法忘
軀立雪斷辭求正法眼藏達磨猶未可信在二祖告云請
師為我安心達磨道將心來與汝安是時二祖曰覓心了

不可得達磨云與汝安心竟二祖便悟從無始以來所有
至今生死不絕皆是妄心過去未來現在皆不可得便知
即今真心遍一切處更無一法可當情當下忽然大悟以
心傳心作第二祖以心傳心至六祖大師之後方始天下
聞知得者不少如今悟無我者便契本心冥合一體遍一
切處一剎那間圓成八萬四千總智法門永不變壞受用
無窮若人不信永不能契反謗正因一剎那間便成八萬
四千塵勞門隨諸惡趣永不聞法永不見佛實可哀哉豈
由風水也佛觀一切衆生世間本自無名姓無男女相貌
無貧富貴賤一物也無一性無性耀古騰今堂堂獨露無
疑毫許間隔不肯自認直下承當作箇無事人供養十方
諸佛普益法界含靈且作麼生是供養十方諸佛普益含

靈維摩經云法身流注五道名曰衆生衆生現時法身不
現若得法身名供養諸佛假使七寶滿恒河沙世界布施
供養不明於性終無利益不如見性識心頓悟圓覺妙體
今此識神種子從無量劫來根塵不脫慳貪嫉妬作業受
報死死生生無休歇時若到這裏更有什麼處風水也且
略舉世間夢幻顛倒花報之相便可驗之且如張三家富
貴具足忽生下一子便喚姓張隨宜立字漸長成人所有
財寶親眷奴婢疋產牛羊田園皆悉委付盡是他有不從
外得都不費力思惟此子過去生中若不作纖毫福善何
因果報而生張三家如是受用如是富貴如今世人但則
見果不見因所以不念修行作諸惡業受果貧窮轉增煩
惱墮畜生身因者因過去生中善果習氣修福修慧或得

塵勞業銷悟得法身見性成佛或得慈悲習氣不造生死
粗業雖未見性習性已定所作所為皆屬善果與不省者
迥然不同果者只今此幻身行住坐卧受用者便是也更
無別人相待只是自性作自性受如影隨形不相舍離分
毫不差唯自定心自覺覺他真實可驗凡夫樂果而不修
因有智之人修因而不樂果所以聖人無已靡所不已神
人無功至人無名隨機應物金剛經云應無所住而生其
心心者正遍知心也經云菩提心生滅心滅應如是知
見父母未生時都無名姓但是世間妄想隨意安立且有
何真實而妄生執捉焉若能於此富貴家為人知因識果
向上增修定生天果報若生天界遇菩薩說法悟無生理
便證佛地若有乘福果生天受天福不習善慧畢竟淪墜

豈不見證道歌云住相布施生天福猶如仰箭射虛空勢
力盡箭還墜招得來生不如意爭似無為實相門一超直
入如來地又如李四家貧窮下賤困苦無極衣不蓋形食
不充口忽生一子屋漏壁穿殊無遮掩赤子初生之時業
風吹體過如刀山冷水澆身勝若寒冰未言終久成人纔
出千般痛苦亦便喚作姓李更與立名父母飢荒不已孩
兒飽煖何來仍且氣力未全早供奴僕恣意鞭撻任意嗔
嫌日夕煩煎便同畜類雖然如是猶賴不失人身且得主
世國王以法護念勿敢殺戮乃至食啗毀傷設有加害王
法無怨官吏不饒未離人形所以如是愚人不知天地陰
陽造化發生萬物以何為主主者道也天地之先萬物之
母一生二而二生三三生萬物萬物歸一元也道佛心禪

真如涅槃名異體同一法之中更無別性若於人形眼見耳聞俱不稱心所以貪嗔癡愛妄想顛倒作諸惡業欲於此貧富二家出頭終不得何謂也現今迷妄識根業性逐波散亂隨所貪愛變成異類之性死墮地獄畜生餓鬼經云三惡道報如在人家還債出頭便喚作牛畜稱呼失却前名姓也畜生異類不一皆是負債辜恩失了人形披毛戴角負鞍啣鏡拽鋸拖犁生燂活剝斬斫煎熬千生萬死無有休息實可哀哉何由風水也故永嘉大師云了即業障本來空未了應須酬宿債李長者云不若一念緣起無生如今若得妙契圓常巍巍不動若談善惡果報沙數難量略舉前項二因果皆如是更無別法喚作中陰所以玄沙大師云真如凡聖地獄天堂只是療狂子之方都無實

事虛空尚無改變大道豈有昇沉悟則縱橫不離本際迷即是夢悟即是覺迷時不知是夢忽然夢覺始知是夢古德云在夢那知夢是虛醒來方覺夢中無迷時恰似夢中事悟了還同睡起夫迷悟本無只是諸佛悟了對治而說故有言章方便利生依覺說迷而稱藥病相治若人既悟本無病何用說藥所以證道歌云夢裏明明有六趣覺後空空無大千是也悟達之士明了自性清淨一體圓明周遍法界方驗一切有相皆虛故曰衆生迷失本源隨情逐業改頭換面出入生死不曾停歇故諸佛以方便出世說法顯邪歸正指妄返真權標佛性化誘衆生衆生佛性名異體同必須離相絕名方堪學道學至無學無功用智道非常道心即佛心大用現前不從外覓直下承當故裴相

國云血氣之屬必有知凡有知者必同體所謂真淨妙明
虛徹靈通卓然而獨存者也是衆生之本源故曰心地是
諸佛之所得故曰菩提若悟入此法門豈獨一名而可稱
歎但隨機應物無離實相而各得解脫三昧故佛稱種智
修假多聞至其報身圓滿一塵不立六祖云本來無一物
何用拂塵埃若有微塵未盡終成窒礙所以未離學地假
饒此生未悟亦不失定性當生定得佛語不虛要人堅信
信深不退無不悟者只恐半途被邪師說法誑妄發疑返
性顛倒撥無因果毀謗正法如飲醍醐翻成毒藥更不可
救永劫沉墜所以證道歌云欲得不招無間業莫謗如來
正法輪圓覺經云邪師過謬非衆生咎佛說有外道邪魔
種族假相現形於人間天上外現法相而心行邪道或現

神通種種變現口說人間禍福令人取信或說飲酒食肉
不礙菩提行盜行淫不妨般若剃髮披緇取貪資財要世
名利誑惑王民擾亂衆生破滅正宗妄立邪法至使一切
淺學不求智者善男信女殺生害命不可勝數要積資財
作諸善事廣建香燈循行數墨喚作看經不知經是常也
常者正心也正心則一餘二非也何可害萬物而利自己
乎自己一性一靈也萬物一性而萬靈也經云蠢動含靈
皆有佛性一佛性者一身多身一佛多佛千百億化身只
是一法身也豈不聞永嘉大師云諸佛法身入我性我性
同共如來合衆生諸佛唯一法性更無二體所以未了人
將心求心使佛覓佛無有了期殊不知一切含靈皆共一
箇真源因迷妄而現形逐物迷已而不能返本辨察自性

與它性亦復如是又何可殺諸無量佛而救自一性佛是
何道理苦哉痛哉如何自取冤債萬劫難酬君不聞吾佛
釋迦如來於過去生中舍身飼帝割肉濟鷹遇歌利王割
截肢體萬死萬生舍命舍身舍財國位妻子眷屬內外所
有一切皆舍它舍一幻身利益一切含靈衆生所以成佛
廣度衆生獲自法身靈明遍照不生不滅直至如今天上
天下獨稱世尊為群生之父作群生之母衆所依向世界
壞時渠不朽莫是喚作小事麼莫是寡聞淺識到此麼莫
是無活計麼善男子大事未成如喪考妣真實為此一段
大事如何別用妄心妄有何益你自一箇性不能修行自
求方便更枉殺無量生靈要作預修望後世福報福則遠
之遠矣禍則不求而自至善男子你要後世福却教它無

限生靈枉遭一人殺戮嗚冤負屈向什麼處安著精魂你
舍自己而利衆生方合諸佛因地事你害衆生而益自己
合三途報修諸佛因得佛果報造殺害因得地獄報如世
間人念念偷盜行劫奪行奸濫作非理事不久入牢獄受
王法各隨輕重如世間人念念修善戒惡憐愍衆生與人
方便於身命財常生布施與一切含生不生一念惡逆之
想孝順父母兄弟親族不談是非好惡行住坐卧不離善
心此人永不見枷鎖永不被人苦惱煎煩設有過去未來
惡果亦成一切善因而變凶為吉雖有相干亦自聞其善
而不見其形耳陰中常有護世善神遮護所謂人發善願
天必從之善者居正惡者還邪只是其邪如水其正如湯
湯雖銷冰不言我解銷冰冰既已銷唯一水也遣邪歸正

六復如是本無邪正人自執捉以虛為實實相法門無一字可說如此今別世間善惡夢幻華報纖毫不差何況此身遷謝金光明經云心識二性躁動不停隨業受報墮於六趣無知無覺業識茫茫無本可據以何為依以何為主雖妙性湛然不生不滅不覺悟且不得用實可哀哉莫由風水也豈不見裴相國云及其斷言語之道息思想之心忘能所滅影像然後為得也故不在言詮表耳嗚呼生靈之所以往來者六道也盡是一念失真皆從無始以來直至如今相媿相愛相殺相吞妄著諸色聲香味觸法萬劫千生結成業網閻魔罩無有出期今此道人家既到這裏皆是不得已而為之方便分別似乎知見學解未脫相似明眼人相笑不少只是觀從上古聖人所說言教也只曲

為今時迷人開發喚作教化衆生以為佛事法則是空空則是色若不權色明空如何明佛理心經云色即是空空即是色受想行識六復如是是故馬大師云凡所見色皆是見心心不自心因色故有又云於心取生即名為色知色為空故生即不生也若了此意方顯今古思齊焉華嚴論主深歎法華經中露地白牛及以是法住法位世間相常住以此顯露明白所以數貫入於一部華嚴之教欲望學者於斯信入不費程途豈不快哉又云以法身用則萬象俱寂隨智用則萬象俱生起為法起滅為法滅故祖云境緣無好醜好醜起於心心若不強名妄情從何有妄情既不有真心任遍知即名常住法身六情諸根得相者蓋為識不破所以不脫故論云得相者謂之識不得相者謂

之智若得六根返聞自性以神聽為入道之意者便合楞
嚴經道旋汝倒聞機是也故永嘉大師云六般神用空不
空一顆圓光色非色此理分明作家念者甚多用者罕有
無異魚在水中不識水若是伶俐凡夫一聞千悟道本無
名故得者標名為母所以善財參摩耶之理其義亦爾且
道摩耶夫人即今在什麼處有麼有麼試道者師云你諸
人在裏許得多少時也速道速道玄沙云切忌知有之人
見這裏若不會便喚作西來意未明徒學多知見不識本
性契道則懸遠是也殊不知古聖先賢所立教法經書一
文一字唯歸一道也三教該通更無別法達者當下忘言
即得其意也更不滯名著相明知覓魚求兔而必假筌蹄
學道參禪須通教典是故圓覺修多羅了義經云修多羅

教如標月指若復見月了知所標必竟非月於此二事且
要識權名實得失自知若還緇素不分未證實相不明道
眼所有見解都成妄想所以我佛世尊於楞嚴會上詰問
阿難及諸弟子愛小乘不求正覺乃云如何世間三有衆
生及出世間聲聞緣覺以所知心測度如來無上菩提及
用世語言入佛知見譬如琴瑟琵琶篪篥雖有妙音若無
妙指終不能發阿難汝與衆生亦復如是寶覺真心各各
圓滿如我按指海印發光如暫起心塵勞先起若到這裏
須是決擇身心分明見解始為究竟所以得兔而忘蹄得
魚而忘筌得意而忘言若三者未有所得即不可忘也忘
必落空空即未有所得未有所得則是空花之相故同妄
大察禪師十玄談詩云祖意如空不是空靈機爭墮有無

功三賢尚未明斯旨十聖那能達此宗又云莫謂無心便是道無心猶隔一重關故圓覺經云彼知覺者猶如虛空知虛空者即空花相亦不可說無知覺性有無俱遣此即名為隨順覺性以要言之迷時以覺為空悟時證空成覺故圓覺經云成道亦無得自性圓滿故圭峰禪師序云成就慧身靜極覺遍百千世界佛境現前所以道信禪師為牛頭禪師說心要云百千妙門同歸方寸河沙功德總在心源一切慧門一切定門一切行門悉皆具足凡是真正見解之人應有言句舉措動用無不是道都在裏許不可離有為而談實相佛祖所出一相一言一拳一指拈槌豎拂指東顧西無不示物明心喚作不壞假名而談實相豈不聞六祖大師云不是風動不是幡動是仁者心動為什

麼印宗法師一聞便悟方知此是盧居士即便禮拜衆立為六祖大師若有依本分真實得法之人不以名相利養及自稱能所接人應無所求應無所住應無所得無心應物隨機方便華嚴經云吾觀世間無一可樂若聞有樂樂是苦因終不可愛迷風水人不知道了悟道人無風水若不解道者不如順生順死順時順理古人云逆則凶而順則吉所謂擇卜吉地者乃是順地也順則不逆於心心是天地陰陽造化之源不假外求應有所作而隨用之用而無用作而無作隨時豐儉所以應自然之分定也又何可逆之逆則凶凶則定禍生禍生則必竟不利也不若依道六合通明亘古亘今光明烜赫不著問人求覓本來不欠少許古德云有物先天地無形本寂寥能為萬象主不逐

四時凋古人恁麼道莫是相賺麼今日普庵到這裏恰似
不會往往這箇老漢只是破一作二教壞人家男女平地
起土堆普庵蓋為從上古人公案未了如此敗闕一場思
之正是破二作三却來淨地上放局這兩重公案還有人
斷得也無以手指主丈云是它却解斷得驀拈主丈卓一
下云勘破了也

歌曰

雪人通身却喫罵兔角拄杖三十下龜毛索子釣虛空道
理本來非晝夜元不借摩尼寶所誰知價一道常光即我
心逼塞虛空無縫罅且如這裏風水又作麼生斷不免重
下箇注脚大家同受用豈富貴不妨普庵一穴真風水乾
坤良巽本無位二十四向絕遮欄非舌頭人云心地也無

賤也無貴眼耳鼻舌通身意無限山人不識龍從前總是
虛勞費千峰萬峰連不斷左右逢源無別水榮華富貴幾
遭埋益子蔭孫無變已驀直下無忌諱司馬頭陀沒意智
隨機設化謾留名箇箇趁禪失却麁更迷已寒食清明爭
掛紙豈知空界現圓融不顧淺深撈水底吉凶禍福一切
不問忽遇司馬頭陀又作麼生道彈指一聲云觸髅盡入
黃金窟法界全彰解脫門伏惟珍重

釋迦文

普庵法供養

大道充虛而亘今亘古凡情劫滯而不覺不知唯心開達
本以談經萬事千機而顯化五千餘卷為化衆生達磨西
來當為何事塵勞六趣百劫不休戴角披毛互相苦擾雖
有出家千萬何異衆生自己業識茫茫那更利它解脫殺

含靈而修福果大似顛癡飽酒肉而道修行蒸砂作飯饒
經萬劫不出三途心淨性明戒珠朗耀在家菩薩豈碍叅
禪經書便是真言依信永無悞賺自是隨塵起業自墮而
六墮它人若肯信心自悟而始令它悟悟則處處不迷迷
則處處落劫如今布路修橋豈比衆生作用信心除殺盜
媼凡夫作佛知見箇中無知識轉凡萬劫難逃出離在此
見聞入佛境界

與心齋諸道友造橋

澄輝入嶺不異化緣一合心齋敏求好禮元老通同莫生
二見易陳道友且奈勞心丁熊諸人於緣加力晏李二丈
般若行深爐鞴完全鉗鎚快利當頭大器只許一槌餘二
則非細搞不住且有圓徹不離慧觀普鑑無私心懃普壽

陳劉諸道友吳許衆知音一切在裏許之人恐老僧口大
筆尖說寫不及之處汝一一相饒放過老僧一着子便顯
慈悲先生法界莫只一似人家屎坑邊小神罔兩一般稍
不呼名便生憎妬缺豈供養便以為讎日劫自欺永不堪
用作大人相善男子汝等累劫曾熏種智今遇斯光照地
獄作天堂轉凡愚為聖種稟齋奉戒作衆善之橋梁行道
諷經揚諸佛之古道豈不快哉莫道我苦它樂我動彼安
究竟一如空花夢影本不修行常居幻化知如幻者幻滅
覺圓不入斷滅自家體取舍短從長經云左肩擔父右肩
擔母遠須彌一萬而若不了心亦不能報父母深恩又粉
骨碎身未足酬一句了然超百億此事更奇且約諸人未
到此田地老漢也應不教壞人家男女一面打起精神乞

錢掠飯做者浦橋汝等切莫道着教化二字恐十字街頭
有一人半箇問你是如何教化你應它不得不能走歸趁
得老和尚來此處敗缺好又聞再索掛子今寫二落三胡
言亂語揚州夜市裏也要知用不着雖然如是當覓箇會
唱舉者全披普掛法不沉埋心齋如是如是衆等珍重

勉前人等幹橋

資深未舉老漢亦如大抵利順無能妙通業識若覺識煩
動則靜慧發生業識煩動則魔境現前覺業二因皆心識
變大凡為事不若順和順之則吉逆之則凶小輩無知所
作無不是逆所以凶多而福少智人百順一體無私縱有
纖魔如湯銷雪凡見雖有定慧何干見恠不恠而其恠自
壞聞見不知而無所不知知見本誰唯佛與佛所舉導化

浦橋三一幻用共成斯事甚如本願人與非人性相平等
時節不差自然如是若因未合緣求之則難若果熟現前
應無窒礙輪次上街由衆歡喜而化緣易就三日一次諷
經也只如然城內恐周迴步闊可准糧而安下不妨想料
韋公能知好惡舞罷之人金無重鑛更加密囑普現如斯
斬釘截鍊做箇大漢圓契切莫胡走胡言一味埋頭藏角
只露眼睛堅固慈悲事成身了圓震心病燥焰難消汝加
息滅心猿牢關意馬村人行動束足顧危靜行清心不退
無返只在橋成別無它事

勉心齋監衆造橋

不求諸聖不重己靈唯大解脫人若出一字一點於十字
街頭早是敗缺不少若更依彼凡流所說者皆是邪風扇

動損折真機箇中密護深藏一任魔說假使鏡輪頂上旋
定慧圓明終不失莫更換機添語我這裏只是即心即佛
莫管它非心非佛如今人只看成望敗誰人知道心齋有
此地位方敢為野老承當這事且一據心齋日用隨時治
彼衆幹以慈悲力廣大心匠人此中未可用欲遣只與晏
公議之十八問與藥隨時應幻了彼空花應有所談普庵
唯十八問耳向道別無靈聖只是村僧但得橋成救取一
半孤峰絕頂良由話會恐有無用人或懶惰發回補洗一
應道友只可精進不奈何莫更放退公私一任時宜大悟
不拘小節此方不比它方珍重

與弟子造萍鄉通濟橋

木公自至會圓契書通濟大事不急不遲道應則一物無

殊假幻時草木相祛於中意氣不離知縣樞機公理私成
何須苦沉疑老僧若枯木應不發花枝有應則作無應自
知幻出本無塵銷覺定化財不及身命布施亦無妨佛事
難成蓋汝因緣未合古人捨頭目髓腦如棄涕唾為求了
心度人汝等若見世間有難作之事不肯舍命向前永不
解脫若自求利則不可也若利衆又何患哉今此遠方道
友雖衆而奈春布在即路途遙遠動經五日方到地頭果
足則一人一千未審歸去平善欲利彼而患於此亦非道
人之用不若逗機應物隨處轉人善化則有信自來公用
則全威急速諸事既成准則只思木料艱難正若放過一
着處處春務在時必竟有妨農事可告宰公大士指司分
引具申保長名目取木匠應有現存熟料計數均分各立

嚴限日下便到橋所即速用工不日而成若更擬議則不可也直是放退至秋月去此料不到其匠亦不奈施工化士亦無手可措老婆之意語亦如如汝告心齋故當善巧以破邪疑

與心齋和光幹橋事

封機備悉讚歎莫窮無限心齋本末如是和光為伴須知毫末不遺慈氏圓融反見文殊初友方是法界純真道場周徹箇中幻事一任方便饒益嶺南人可將豈果足遣之老僧勘破了莫與它再來令它速遠去你自心知更莫待我說破此筠陽漆道友亦可便遣不消留它各家有事恐有人要來且放退別後却來而今暑熱百里之音已聞夢幻空花臨時殺活諸寺官疏如之奈何故非我咎焉彼自

紘紘宿興因果十方折九也管一分不妨別無事老僧某和南心齋和光衆等寬迴寬迴且喜且喜嘆更照顧末後一着○

造通濟橋信勉心齋及諸弟子

普雲迴備悉通濟浩渺只賴心齋以無功之功功不虛棄力用遍周與佛無二向夢室中聽衆寐語自知點首有時語言相似成句及乎連喚又不省教我向誰道恰似觀索抽木象轉動音聲是誰措乎得恁麼久迷塵劫唯佛與佛乃能知之蒼天蒼天與麼舉話好沒交涉十字街頭且要脚跟不點地正好着力說與圓契汝且一心堅實此事不虛忽然自有了當圓信千萬莫失却那箇當為老僧猛烈不退表初因入果圓定前日若回如今恰在野狸口裏了

也又且慚愧救取一半圓德你向縣郭心裏弄箇村田樂
獻它我只要橋成莫管人笑韋公萬回二道友且子細照
顧左右若得橋行心亦行莫教孤負見貧僧不因通濟何
如此暗室千年忽遇燈諸道友在者我無不知之一夜念
普眼經無數遍乞保各人安樂老人和南

與弟子造橋

亨老能人宣風有幸諸大賢長者福應橋成為千古之宗
標作萬年之佳瑞道安人樂旅快輪輕出自衆心如是圓
覺道濟昌榮立道李公加之諸公道友用心者皆不可說
必竟祿壽增高道行深廣捨不斷命之財布不煩惱之力
竹木全機成大佛事廣度有情同登覺道捨多福多施少
福寡泥多佛大水小源微此心公正智不可擬多虛而少

實不可口說而心瞞直是如平等盤不賺銖兩那頭欠少
秤尾指天這邊稍多秤鎚墮地又怎奈何中心把紐子人
教它添又不肯添教它減又不肯減致令主人難為喝斷
還有人喝得當麼良久云除非臨濟出來始合得老僧話

圓澄汝性顛倒且更琢磨堅善淨諸普字及在此中道友
且一一耐勞順善慈悲打供助發本光都料衆心早速成
就別有好生好活我等你若遲機誠當自墮耶珍重

與亨老造橋

矧旦到聞疏未發取在有時此中江夏族屬皆承善知識
前已經過只驗其事畧不知理所以正法遠矣邪法敗闕
於中未識其理不辨邪魔字義不通機輪難透且互換臨
時隨宜妙應有無俱遣實不空空又談此中古岸一事若

無纖毫之窒碍令俗無傷甯之談與匠橫鋪可謂道無間
阻行無怨惡若也未圓種智不然只就如今饒木力以無
言表造物而普順人心不一佛行皆如打過一番清風明
月誰能向無明堦下口說驚凡那肯於盲目童前示明無
暗不因來命安可倩伊珍重佛恩報緣如是再幻一疏可
表威嚴聞道普庵疑斯未實身老○珍重

靈濟橋語

此渡若非橋不放衆生過過去現在佛并西來達麼皆是
接群迷直指人這箇○如今人不知顛倒成患禍堅執有
為功善惡爭揚播學道不識心所以塵不破若悟即本心
永劫無退墮說法非干舌山河大地和行脚不曾移舉步
無空過如斯妙性空方與人擔荷大用這無心非福亦非

禍於中無妄作不異阿彌陀法界無別物一菩提為座修
橋布路為含靈轉凡成聖如行貨遊戲菩提誰得知只恐
迷情却放過大丈夫莫放過提起眉毛來繼和大家拍手
渡橋來方笑普庵只這箇○咄開口全音只我聞桃花含
笑亂紛紛心非遍界真成妄意淨情忘法法真

造袁州浮橋語

普庵教化修浮橋信心自肯大豐饒解脫皆因不思議度
人無量永逍遙秀江千古源何極非干今日與明朝一生
補處誰知有萬德咸歡寂體察蛟子眼中藏刹土紅爐焰
裏爇眉毛毫髮虛空全不漏海山相擊浪滔滔石牛喫盡
張公粟木女垂絲釣巨鰲新羅國打西川鼓東震旦拋北
越刀孔自孔毛自毛針劄不入大雄豪妄想顛倒蘇公盛

未解撐船弄竹篙豈在文言多卜度德山拄杖不敲槽

萬載縣橋疏

萬載洪機一發直得耳聾眼瞎放身通濟仁心度盡微塵
佛刹勸英賢須特達百億龍天齊鑒察大開寶藏施珠玕
箇裏無私一毫髮

修城東合浦橋

自性圓融不碍為浮雲枯木任風吹莫恠道人無伎倆猶
如浮木歇盲龜

應化非真不逆心有無俱遣道須成相逢便肯無空過合
浦橋邊驗果因

谷心齋居士布橋

○某啓定應心齋無心如實謂希有希有老驢應動唯

風風可名乎杜門三昧通濟一如黃面老師云三千大千
世界一滴之雨猶如目覩所受用物子細勘會亦未是大
出脫底末後一句請心齋道若道得只合喫取一碗飯若
道不得只合飯喫取一碗更恐無人相共倩圓契亦得來
歷分明驗取好書勲足認於宗濃句意寬弘而備悉主伴
互融雙彰本末悲智同運心境無差不因孤露妄難休大
事既成難悉婺江烟梅雨却知音 出頭人有何極師子
兒無畏力滿目相知不相識枯木寒灰唯我知浩浩資深
源汲汲翹松野鶴表吾師吾師心兮心常寂常寂光中饒
益人不然且道乘誰力○得得仲能口吐萬載光鮮盡出
心齋等一切道行辨自己大事度濟舍靈古人云學道如
鑽火逢烟切莫休直得金星現歸家始到頭再發一鞞穿

靴幻力繩索堅牢回罷將歸皆如佛事若更無人擔板何
不用密跡金剛揚眉早似過多努目則一時周匝切恐百
里好事來命老僧四天門王扛也不動圓契當知無令惱
我我於初九復入南岩鼻孔撩天雲騰致雨露結為霜末
後一句秋收冬藏老人寐語取笑珍重

加頌蜀僧雪頌并序

蜀僧道存於紹興十九年七月謁疎山得悟特往愍道者
處印證蜀僧存公生緣受業及得法之師始終詳悉後人未之知此但據普庵所錄云耳遍歷諸
方求友其人希有後辛巳冬月節忽到南泉與普庵契合
祖道說見無有二解各以無相三昧重相詰問直得心心
相印法法融通針芥相投毫釐不隔忽有行者請益蜀僧
乃指雪書頌一首普庵隨後一句加三句遂成八頌游戲

法喜禪悅二人相笑不覺到這裏敗闕一場

頌

庭前雪子落紛紛妙觸靈明應普門不是藥山無用處權
令龐老警兒孫

總是吾家入道門無說說中間不聞步步透關田地穩須
彌躄跳撞崐崙

行人到此宜迴首此物元來處處有除非自己肯承當方
信境緣無好醜

免使從前業浪奔直入圓音普眼門賓主歷然誰委悉不
是通方莫與論

三世諸佛同此路天無門兮地無戶森羅萬象一光吞歷
劫不曾少益醋

百千方便一乾坤得者還須皂白分珠體未明成五色舉頭鷄子過羅村

淨人若信平常事穿過觸髅連孔鼻多中一了一中多城東老母難迴避

自有山翁樣子存家傳祖代沒分文南北東西無別有光明遍照獨為尊

頌三門

從其文殊門入者大地山河助汝發光

古寺香華迥寂寥焚修報國化迷流英賢到此須迴首撥草瞻風笑點頭

從其觀音門入者蝦蟆蚯蚓助汝發光

此舍絕邊無僻落充虛露地真寥廓往來只道主人寬爭

似永嘉一宿覺

從其普賢門入者不動步而到

道人活計若虛空應物無心世豈同假立化城標寶所暫時指客悟寰中

既到這裏方知往來悉皆不異

釋達空空遍覺華到無高下淡渾茶和雲假宿烟霞榻明日東西處處家

化齋糧語

古寺香華居無常產今則化緣不斷由茲法會闕莊嚴外粥辰齋日有四來無可薦若得妙嚴施主廣發大心令它一飽忘千飢鼓腹謳歌而樂道此中僧行不念衣食而擔化檀那土地山神不受香燈而提凡接俗設有一粒所施

永不落空那堪價值廬陵必無外物若肯信自心不由它
悟去年不肯三方今日法無門戶幸勿見疑卜度從教殺
活臨時向道不讀華嚴經不知佛富貴化彼三千七十士
唯恐迷流增嫉妬不患寡而患不均後代綿綿常貴富我
道無心粥飯緣飢食渴飲全無措一家有事百家憂心淨
還如佛淨土廬陵米價也尋常一粒破時全體露珍重

化無盡曆

化城立有誰知意普雨調和潤萬機大根枝節全體露何
殊彌勒降生時石兒拍掌連雲指木女含笙和水吹試問
燈籠誰解舞知無我者快拈鎚○咦

楞嚴行道法語

切以白銀世界觸目而不出普賢法悟真如動靜而無非
佛事七處九會徵心大要於八還妙湛總持不動洪音而
普應箇中智用慧體無私三千道侶果今圓寶所樓臺光
普現當斯慶懺共遠彌陀龍神共贊道無功帝釋欽聞佛
莫比奇哉如是三界縱橫一道該收功成不日伏願皇圖
永固佛日增輝郡邑臣僚護民樂業當山土地時聽梵音
遍界含靈咸承般若歷代非心未證今當隨智同輪古今
捨地荆山盡入普庵三昧現在法子究竟菩提海會信人
皆歸實相燈傳無盡法惠何窮妙應水月空花純熟衆生
覺路仗皇覺以證明仰龍天而洞鑒

萍鄉縣丞求頌

杜門終日不通書得意忘言總不拘舉向世間人不會妄
談生死事區區信香不昧和光藝禍福皆心豈有殊心本

全真含萬有只緣六處起諸愚眼耳舌鼻身意靜箇中何
物礙明珠照天照地元不壞非心貪妄命須臾天命五旬
當見覺從其耳順縱心如老人百歲光無變休將庚申叩
文殊了道即心含法界心無應物合菩提但勸諸人心莫
怕豈勞心上外求諸為君一念真空體肯信無心道不虛

謝戴安撫書院額

普庵以此香回向大居士幻盡覺圓者妙意難遮覆惠我
二筆端三昧非迷悟世間豈識知何處尋門戶六字光慈
化千古人欽慕象出普庵名天龍常守護法本付賢侯利
益何窮數傷嗟逐末流忙忙失元路千里萬里體無間世
出世間非我所唯野鶴自得無心應故如是謝安撫雲軒
密布巴陵時願垂青眸垂一顧珍重○咄

萍鄉縣宰差淨樂僧首求語修宣風橋

店宿希雞唱天明眼未開丹霞沒火炙木佛化成灰院主
眉鬚墮寒山叫善哉木人無自性機關拽線催淨樂無箇
事金弦彈子來孤鶴翹松頂得意懶相陪倫搦筆端口披
雲帶雨回維摩詰有問搖手指天台

標羅漢法語

千燈一室萬象鏡涵佛化一身多身法演多法一法聲聞
緣覺四果六通本末同根宗標迷悟或現天台南岳往還
天上人間指體則未悟全身行解則慈悲接物須陀洹着
枷置杻斯陀含釘枷虛空阿那含雪上加霜阿羅漢益添
海裏半千八伯如恒河沙主伴交參幻如佛事佛祖不欠
羅漢無餘普光明殿妙難窮信士随心而布施觸目常在

應不落空是故標名永彰不朽

題三門

玄之又玄衆妙之門空之又空一法常存要見本來真面目除非直入這三門又道無門為法門無入是真入君禮信佛心有為皆不及舍財離相契無生天耳廓通塵不立為彭褒標法堂語

伏以芥子納須彌針鋒收刹海三萬二千師子之座維摩方丈尚猶寬一百一十寶所之城善財不動常周遍是知百千世界佛境現前法體堂堂豈干修造只為執心成境背覺勞生智者權設標宗信心便能頓契以褒念父恩之固極恨報薦以無門憂母患以有身憑何功而慶永是用捐輸金穀大豎寶坊妙音圓徹鎮敷敷天地同根如一體

即心是佛佛外無心含靈盡入於光中父母緣生而俱寂父寂滅而為樂母生法以無生季昆萬行以圓明九族靈蹤而舍識正當恁麼時將此深心奉塵刹是則名為報佛息

同輪歌

師乾道四年佛生之月書于東井以益參徒之知而不昧也

應機互換不空同任運隨時轉此公豈用千尋麻索拽指端輕撥滿寰中活潑潑耀玲瓏相繼聯綿不斷窮誰識那邊關捩子閑搖取笑各西東能應急也資慵無求不得此輪中墜石此時猶拙計力多功淺衆難供斯用寡意豐濃八萬塵勞一點融飢渴永銷從此脫兒孫代代得昌隆不費力實從容超彼迷流撻井中莫令繩斷沉泥底手脚茫然杳絕蹤謾道同輪歌表裏到來觀者莫僂佻知道本來無可說屈伸俯仰示宗風

讚三十六祖頌

第一迦葉尊者

師子體無二拈花應笑時然燈從此焰不斷至今輝

第二阿難尊者

誰易阿誰難多聞不透關忽解空無我內海更藏山

第三商那和修尊者

無事商和那翛然了義多是法不可說轉念摩嚕陀

第四優波迦多尊者

優波耶鞠多三昧力降魔法傳香種子意氣尚周羅

第五提多迦尊者

提多迦初生光超日月燈山頂泉迸涌此路少人行

第六彌遮迦尊者

大士彌遮迦憶昔阿私陀邪正通一道無法不調和

第七婆須蜜尊者

針劄不入婆須蜜正念何勞多氣力往劫親獻如來座襄

王國裏逢知識

第八佛陀難提尊者

佛陀阿難提放光從肉髻因逢師論義得入三摩地

第九伏馱蜜多尊者

伏馱蜜多惺惺父母與佛非親五十不行不語一見本人

清淨

第十脇尊者

脇本蹄難生泥牛入海耕隨機千萬轉無止亦無行

第十一富那夜奢尊者

咄哉瞿曇氏唯富那夜奢不拘有無種遍地法蓮華

第十二馬鳴尊者

馬鳴分身百億論數玄詮無極六通三昧降魔不用色聲氣力

第十三迦毘摩羅尊者

迦毘摩羅師外道成正真了斯第一義非故亦非新

第十四龍樹尊者

龍樹非形相獨現圓月體說法如虛空非舌談真理

第十五迦那提婆尊者

迦那提婆針投鉢深契無相心解脫辨因木耳再來人巧幻不虧於毫末

第十六羅睺羅尊者

過去娑婆樹如是羅睺羅師子同坐食付般若摩訶

第十七僧迦難提尊者

莊嚴聖王子僧伽號難提棄國避世榮便入三摩底

第十八伽耶舍尊者

伽耶舍多人再來常持圓鑑離塵埃風鈴非響我心應一返常光更不回

第十九鳩摩羅多尊者

降生月氏國名鳩摩羅多宿乘尊者記不二阿彌陀

第二十闍夜多尊者

闍夜多因地昔為自在天一契無作性大用得言前

第二十一婆修盤頭尊者

婆修盤頭尊曾禮大光明以杖畫佛面悔過復天真

第二十二摩拏羅尊者

國名常自在王子摩拏羅化鶴成菩薩動止湧禪河

第二十三鶴勒那尊者

鶴勒那有智光大包天地五道貫色聲日月時親禮

第二十四師子尊者

真師子法身究竟無頭尾賺當盲眼人華空疑不是

第二十五婆舍斯多尊者

斯多婆舍檐板重鍊出金剛眼正法不動纖毫越祖超師
無間

第二十六不如蜜多尊者

德勝王太子號不如蜜多指山還梵志魔群不奈何

第二十七般若多羅尊者

般若多羅法非廣亦非狹翠竹與黃華長松并短柏

第二十八菩提達磨尊者

菩提達磨大醫王全持正法度南方粉骨碎身應未報至
今不離此心光

第二十九慧可大祖禪師

直截猛利立雪斷臂千古萬古丈夫意氣○吐

第三十僧祭鑑智禪師

精通無說說本地亦無生無生花滿地本傳無盡燈

第三十一道信大醫禪師

破頭山下起清波流注黃梅不奈何四度勅宣端不動尊
威妙湛灌娑婆

第三十二弘忍大滿禪師

百鳥銜花未足奇直須透過始方知五百衆中誰委悉
頭私許老盧錐

第三十三慧能大鑑禪師

曹溪一滴水周匝無餘欠孤峰絕頂浪滔天大洋海裏金
剛焰

南岳懷讓大慧禪師

馬駒踏殺天下人且有什麼相交涉雲作枝竿雲作花妙
光圓寂舍空劫

馬祖道一大寂禪師

一口吸盡西江水子細思量未足奇身含無盡之虛空箇
事元來非擬議非心非佛又較些即心即佛猶寐語

温州永嘉玄覺無相大師

十方諸佛入其中十波羅蜜一光同十世古今無間隔十
身千億法身通

百寶光明

青黃赤白異塵寰知音希得似寒山豐干未辨爭饒舌光
明不遍道應難

一一光明

日月燈光未足奇若逢肉眼轉迷癡恒沙眷屬光無二萬
億龍天守護持

皆遍示現

春有百花冬有雪夏有涼風秋有月若無一事掛心頭箇
裏無私真廓徹

十恒河沙

塵塵剎剎號南無末後收來付老盧結果傳燈周法界誰
人肯辦此工夫

金剛密迹

牙如劍樹目如燈電爍妖魔法不生千聖出頭難插足普
菴也道我無能

擎山持杵

擎山抱岳疾如風持杵拈槌解脫空世間有相非身大須
彌烝納一塵中

遍虛空界

和風周匝萬花開春霧濛濛鎖綠苔世人寐語不知意黃
鶴樓前不賞梅

大眾仰觀

多身一體少人知不體無空自執迷除非妙達斯三昧箇
裏圓觀始不疑

畏愛兼抱

南山有條鱉鼻蛇雪峰往日鎮常誇喪身失命知多少滿
地如今號菜花

求佛哀祐

母子相逢幾萬年夕陽夢斷豈堪言多時不隔如今見趙
州勘破老婆禪

一心聽佛

不聞聞了絕狐疑三界浮囂總不知泥牛入海通消息木
馬橫嘶貫紫微

無見頂相

無影樹下誰相識
瑠璃殿內絕形名
千巖瑞色祥光現
萬壑松風和沒人

放光如來

主伴重重絕世倫
今朝即是舊時人
迷悟是誰堪話會
姚黃魏紫一般春

宣說神呪

癡人著色又扣聲
豈解圓音不可聽
自古迄今宣不斷
到家方覺少知音

題鐘樓語

伏以鐘須含響假玄懸
擊以方通聲色全真
非色非空而廓徹
但以立境總標心
只欲識心而成佛
隴西族屬樂善
歸心報先祖之英靈
續兒孫而久遠
七寶樓臺充法界
欲

令刹土足圓音何災難而不消
何冤讎而不釋
理含諸佛智納萬緣
一聞千悟妙難思
透石穿雲千百億

題寶塔

塔本無縫

真如不動

說此經處

涌出虛空

釋迦多寶

聽說如夢

東西無二

見見不同

無刹不收

無色不融

層層落落

光影重重

恒河沙劫

盡入其中

三世諸佛

一法身通

針劄不入

壽量無窮

目連舍利

常隱於中

阿育王像

妙色金容

天龍八部

萬億靈通

擎山持杵

遍滿虛空

護持禮塔

摧滅魔蹤

顯正寶塔

八面玲瓏

水火不壞

障毘嵐風

衆生見者

永脫樊籠

信者施者

功德不空

無住布施 福德無窮 住相布施 猶滯途中
諸佛子等 無功之功 成如是塔 標指宗風
空劫壞時 此塔不鎔 劫火洞然 體若虛空
究竟涅槃 應時體用 逗機應化 無法不同
皇圖永固 舜雨堯風 郡邑宰僚 祿位高崇
萬民快樂 五穀盈豐 狼烟自息 瑞氣和濃
性相平等 含靈體同 世出世間 色不異空
稽首和南 禮塔事終 乾道四年 戊子季冬
南泉慈化 肅老遺風 法界有情 一切环重

題經樓語

伏以般若貫華嚴涅槃通寶積迷則龍宮海藏悟則一字
不識教演三伯餘會度人無數百億如今滿目放光明十

二部經詮不及崔田彭族祖墳林無欠無餘樓獨立大千
沙界納其中無說無聞真利益遠祖近宗無不超得意生
身乘此力現存一族福綿綿世出世間福何極

李總幹遺詩十四句師於一句之下加頌七句

僧家起大屋枉費它金穀不是明眼人真如大地獄黃葉
止孩啼只要免啼哭不犯一滴酒不動一片肉

蒼棟如翬飛世間那得知不是風旛動如如應妙機青青
是翠竹孤雲無性馳頭頭垂示處子細好明知

殿堂何所有夢幻非堅久竹木從何來箇箇人空手石人
解綵畫木女添燈油此事誰得知真實泥牛吼

塑箇泥佛兒肚裏藏深機聚沙為佛塔猶尚獲菩提父見
諸子劣且教令讀書一日成名後天下總皆知

朝朝去禮拜誰識丹霞在打倒木佛燒院主反招罪得相
而無相參方會不會如來非大身老盧快踏碓
便道福相隨生天果未遲力盡箭還墜來生不如意假施
湍七寶不如發真歸布施有為者觀來真自迷
問它怎如此日輪正當午鼻孔廓遼天我道無門戶唯佛
與佛知有為無作做若問如何道瞪目不相顧
我要警昏迷迷人愈見癡九年面壁坐不露一毫釐法說
無可說機陳不二機箇中若不會學取須菩提
昏迷曾未警勞我箇眼睛絲毫全不漏雲月事猶新達士
知幾者常看無字經打動和山鼓舞起道吾神
自家先已癡逢迷實不迷能令石人舞解使木哥吹窸窣
孤雲裏逍遙勿我知萬億恒沙佛皆同一性齊

不如茆蓋頭裹箇大枯髑鬼窟作活計閻公未肯休佛以
法為身不可以相求一念無心者法界剎那周
靜坐取片時妄想自家知心口兩不同修行不透機明朝
與後日作箇野狐狸因果全不落百丈一言迷
有人來問我如何向它道喪身失命處世人怕死到三界
唯一心萬法唯心造不悟生死者輪劫空招報
山僧總不知知不知實竒空知未達本不免墮頑機世尊
拈花慶天人豈辨知迦葉破微笑古今信無疑

師又云

普庵見一箇蝦蟇度日常吞鱉鼻蛇獨立卓然真可畏身
和雲月粲星花太公一見便收釣謝三得意躡玄沙幾多
獨獸無藏隱不斷聲孤問水涯

頌四賓主 并序

彭李二丈一日閑訪普庵三人覲面直得無言可說無理可伸是知主客淵默同空一更無三身非別體言說強名摸到這裏學海乾見解盡獨露本源光迥迥臨行聊舉四賓主大地衆生無性命唯有資深與國英拈得老僧杓子柄如今杓柄在手本分事又作麼生此話放行三十年後好舉良久云却較豈子珎重次日資深出示四賓主頌老僧熟覽顯然句意皆到若不遇上上之智聰明達士祖道正當未法孰能顯露拯救迷途老僧再歎奇哉不勝悲感故知君達在不言之理用轉凡流未絕離微誠當努力古德云學道如鑽火逢烟切莫休直得金星現歸家始到頭如今放散向後難尋大悟方

知一切不著更問什麼龐老裴休達磨古佛成現只今更無別法老僧向雪上加霜於君妙意重頌正因無勞執滯之心但貫一門之用也普庵寐語

賓中賓 借錢沽酒設狂人常常負債無依倚謗教虛招地獄因

六道四生同一輪見它生滅未為真直須打破獼猴鏡識取光中弄影人

試聽無言童子說未徹還同第二月妙機普印絕思心六月炎天鋪大雪

直須認得本來真智識心知外道人朕迹不留無對待乾坤無不是吾身

賓中主 日夕離家頻得書幾回客夢經秋雨直至而今

賃屋居

賊是小人君記取好手白拈猶未許坐斷聖凡絕見聞揚
眉且勝拈花舉

一揮凜凜劍鋒寒函蓋乾坤絕自觀堪笑天龍無可說示
人祇在指頭端

直下無君回避處聲色全彰第一義取相凡夫永不知頓
悟圓音方了利

主中賓 近日門風革故新相見相聞俱不謬時時笑覺
夢中神

大地山河眼裏塵自古至今強立名祇箇絕邊無縫塔不
曾來往逐人情

要會箇中真活計釋迦老子不蓋被更尋祖意外馳求管

取下梢落魔魅

騰騰師子露全身吞却森羅萬象形頭尾也無常獨步眼
光不眨大驚人

主中主 無相光中施法雨醍醐一味灌群機皆入無為
涅槃宇

活卓自由把不住正令當行無本據除非北斗裏藏身杳
杳冥冥沒住處咄却在這裏 又云 薦

無邊無表實希奇虛空為鼓須彌槌輕輕敲著作金聲試
問同參知不知

何處更容絲髮許脫體無依誰會舉玄玄了說玄玄究
竟談玄猶寐語

賓主互用動亦非動佛祖機關不妨重弄法共不共十八

何用一相無相自知輕重信手拈來得時不會龜毛作過
兔角受罪山河俱動此義失宗宗非山河俱動是夢動亦
不動收來無用這回捉敗永不費功賓亦無賓道孰可名
舍父逃逝契悟方親主得真主佛祖共舉認賊為子不敢
相許萬國來親唯一佛身血脉不斷得者忻忻更下注脚
盲人摸索見中求見病消求藥和光同塵沒量智人有誰
相識資深資深又云好與普庵草料嘖

彭心齋諱逢源自作頌呈師師於一句下加三句

妙哉心齋淺入深埋欲識神通并妙用何妨運水及搬柴
光大深淵市地周天常憶江南三月裏鷓鴣啼處百花鮮
中有居士吞光飲露無相光中有相身無明路上無生路
左右逢源大目捷連猿抱子歸青嶂裏鳥嚙花落碧巖前

三昧諸頌

心

佛共衆生只此心 悟迷不間古同今
千名萬字何交涉 達法圓光許一針

神

出生入死是通神 全體三生父母靈
不是如來知見力 舍身財命卒難昇

和

千光一合圓如鏡 萬象森羅影現中
此光大用如如體 道了橋成風月同

浦

空色無邊際 離垢摩尼圓
能依實相用 助發有龍天

神

神光遍界 體若金剛
威神力固 邪宗銷亡

佛

裏許若無這箇
我體不空無住
會看木人牽鋸

何為古佛傳心
用時越古超今
始令石女穿針

○ 百納骨董袋

一切皆我入一切莫能入
達此妙縱橫三世佛佛佛

◐ 大虛塗毒鼓

有病聞皆愈無病聞皆死
死了却甦來誰曾辜負你

● 無底瑠璃井

忽尔墮其中勝修萬劫功
跳出跳不出瘡痍又盲聾

○ 分明無背面

相逢不相見年年桃花面
臨川下水船梢公力方便

⋮ 獨脚老虎

暗時暗殺人不識是眼睛
與君無着力溪雲罩古城

○ 無根樹子

混時非出入頭尾應皆急
妙了過這邊渡海何曾濕

香積厨法語

嘆(好)辦(心)以此三法為三昧無量無邊世不會我今修供

佛衆生萬聖千賢悉同共摩訶般若味真如十波羅蜜同
受用大家着力要精專一粒微塵不許動為報龍天并八
部莫入厨中乾打闕監齋使者在眼前守護普庵無罅縫
針劄不入起馨香十八元來佛不共

贊護教

土地

給孤施地慈化為尊護人成佛功德奚論

二王

仰山顯迹契會宗師一法性身利物宏慈

南岳靖王

以南權正無心應物威德標宗不可輕忽

關王

因權反正辨道玉泉無相無空義足先天

五通

契那一通方全六用護持般若法身不動

楚王

卓立竒功回光識性宇宙恢彰一身清淨

又普贊

一成一切成一壞一切壞法身無二相總別無罣碍凡聖
本自無性天真常在寄語住山人伊作麼生會

移五瘟出市心

助佛揚名化俗徒遣邪歸正沃心枯國風雅泰民歡樂只
這和瘟大丈夫

普庵至善弘仁圓通智慧寂感妙應慈濟真覺昭貺惠慶
護國宣教大德菩薩語錄

五十四

